

## Dithero tsa Tirelano mo Kutlwanong

*04/2014 Thero ka Sontaga wa 4 mo sebakeng sa Adfente, e le ka 22. 12. 2013*

### **MO LEINENG LA MODIMO O E LENG RARA LE MORWA LE MOWA O O BOITSHEPO!**

1. Sefela sa 46 - 44/46

**2. Thapelo:** "Opelelang MORENA sefela se sešwa; gonne o dirile dilo tse di gakgamatsang. O fenyha ka seatla se se jang, e bong ka letsogo la gagwe le le boitshepo. MORENA o utlwaditse pholoso ya gagwe, a senolela matlho a ditšhaba tshiamo ya gagwe. O gopotse bopelontle jwa gagwe le boikanyo jwa gagwe mo Baiseraeleng; dikhutlo tsa lefatshe di bonye pholoso ya Modimo wa rona. Dudueletsang MORENA, lona ba lefatshe lotlhe; ponyegang, lo ipele, lo opele!" Ps 98:1-4. Amen.

3. Epistolo ka fa thulaganyong ya 2 e kwadilwe mo go Bafilipi 4:4-7;

Efangele ka fa thulaganyong ya 1 e kwadilwe mo go Luka 1:39-56.

4. A go ipolelwe tumelo ya bokeresete!

5. Sefela sa 43 - 41/43

6. Thapelo ya mmadi wa thero.

**7. Lefoko la thero** ka fa thulaganyong ya 6 le kwadilwe mo go Isaya 52:7-10, le re: "Di dintle jang mo dithabeng dinao tsa morongwi yo o itumedisang, yo o utlwatsang kagiso, yo o begang mafoko a a molemo, yo o bolelang pholoso, a raya Sione a re: 'Modimo wa gago ke kgosi.' Reetsang! Batlhodi ba gago ba tsholetsa mantswe mmogo, ba duduetse; gonne ba tla bona ka matlho, ba lebaganye nae, fa MORENA a boela kwa Sione. Ponyegang lo duduetse mmogo, lona marope a Jerušalema; gonne MORENA o gomoditse morafe wa gagwe, a golola Jerušalema. MORENA o semile letsogo le le boitshepo la gagwe fa pele ga matlho a ditšhaba tsotlhe. Mme dikhutlo tsotlhe tsa lefatshe di tla bona pholoso ya Modimo wa rona." Amen.

**8. Thero:** Phuthego e e rategang ya Morena wa rona Jesu Keresete, re mo sebakeng sa Adfente. Ke sebaka sa go gopola go tla ga Morena wa rona Jesu Keresete. Kajeno ke Sontaga wa bofelo mo sebakeng sena sa Adfente. Ka Laboraro re dira moletlo o mogolo wa go gopola botsalo jwa Morepholosi Jesu Keresete. Mafoko a thero ya kajeno ke a a builweng ka molomo

wa moporofeti Jesaya, o ne a kuela petso ya Modimo mo godimo ga morafe wa Bajuta ka ntlha ya boikepo jwa bone, jwa go tlogela MORENA Modimo, petso ya gore ba tla isiwa kwa Babel. Barategi, moporofeti ga a fetse foo, mme re mo utlwa a rerela morafe kgang e e molemolemo, e e monate, a o rerela kagiso, a o itsise pholoso gore Modimo o tla golola morafe wa ona mo seatleng sa kgosi ya kwa Babel, a o busetse gae. Ke gona re utlwang Lefoko le legolo la kajeno, le le reng: **Ponyegang, lo duduetse mmogo!** gonne MORENA Modimo

1. o golotse morafe wa ona;

2. o senotse pholoso ya ona mo matlhong a merafe yotlhe.

1. Ponyegang, lo duduetse mmogo, **gonne MORENA Modimo o golotse morafe wa ona.**

Phuthego e e rategang, re setse re utlwile mo matsenong a thero ya kajeno gore morafe wa Bajuta o ne wa bediwa ke Modimo ka ntlha ya boikepo jwa ona jwa go kgaogana le ona. Ka ntlha ya boikepo jwa ona wa isiwa kwa Babel. Go ne go se na tsholofelo ya gore ba tla bowa ba gololwe mo diatleng tsa baba ba bone. Phuthego, mafoko a Lefoko la thero ya kajeno a supa boitumelo morago ga khutsafalo, a supa kgomotso morago ga tlalelo, a re: "Di dintle jang mo dithabeng dinao tsa morongwi yo o itumedisang, yo o utlwatsang kagiso, yo o begang mafoko a a molemo, yo o bolelang pholoso, a raya Sione a re: 'Modimo wa gago ke kgosi.'" Go ntse jalo, barategi, Modimo wa rona ke Kgosi, ga o palelwe ke sepe. Le fa tsholofelo e ka fela mo go bone ba ba tshwerweng, ba sa tlhole ba bona gore ba tla boela gae, le fa go ntse jalo, Modimo o a ba gopola, o gopola batho ba ona. O solofetsa go ba golola mo seatleng sa baba ba bone, wa ba busetsa kwa gae morago kwa Jerusalema, jaaka mmoki a boka mo lokwalong lwa Dipesalome, a re: "E rile MORENA a fetola tatlhego ya Sione, ra tshwana le ba ba lorang. Foo melomo ya rona e ne ya tlala setshego, le diteme tsa rona tuduetso. Foo go ne go buiwa mo ditšhabeng go twe: 'MORENA o ba diretse dilo tse dikgolo.' MORENA o re diretse dilo tse dikgolo, ra itumela."

Bomorwa-Rre, bomorwadie-Rre, Lefoko leo le lebagana le rona kajeno. Le rona re ne re tshwerwe ke mmaba wa rona, e bong Satane, a re isa kwa Babel ya bolelo le ya loso. Mme le rona a re utlweng mafoko ao a a itumedisang, re sena go hutsafala. Ke mafoko a a gomotsang, re sena go tlalelwa. Modimo wa rona ke Kgosi. Ga o palelwe ke sepe. O re utlwela botlhoko rona ba re leng batho ba ona ba re neng ra tshwarwa ke Satane, wa re romela Mogolodi yo e leng ene, e bong Morwaa-ona Jesu Keresete, a tsalelwa kwa Bethleheme gore a re golole mo thateng ya ga Satane, le mo botlhankeng jwa bolelo, le mo losong, le mo tatlhegong e e sa

khutleng, a re busetse mo Modimong mo legaeng la bosakhutleng mo legodimong. Ka moo le rona a re ponyegeng, re duduetse mmogo, gonne MORENA o re gomoditse, o re golotse rona batho ba gagwe ka ene Morwawe Jesu Keresete. A re utlweng le Lefoko la bobedi le le reng:

2. Ponyegang, lo duduetse mmogo, **gonne MORENA o senotse pholoso ya gagwe mo matlhong a merafe yotlhe.** Barategi mo Moreneng, re setse re utlwile gore Modimo o gopotse morafe wa ona mo botshwarong jwa kwa Babele, wa o golola mo seatleng sa baba ba ona. Fela jalo Modimo o gopola batho ba ona mo dikhutlong tsotlhe tsa lefatshe kajeno, o ba bontshitse pholoso ya ona ka go ba romela Mogolodi wa nnete gore ba pholoswe ka pholoso ya nnete. Ke gore Mopholosi yoo yo o tsaletsweng kwa Betleheme ga se Mogolodi le Mopholosi wa Bajuta fela, mme ke Mogolodi le Mopholosi wa merafe yotlhe, wa batho botlhe ba dipaka tsotlhe, jaaka Modimo o bua ka mafoko a moporofeti a thero ya kajeno, a re: "MORENA o semile letsogo le le boitshepo la gagwe fa pele ga matlho a ditšhaba tsotlhe. Mme dikhutlo tsotlhe tsa lefatshe di tla bona pholoso ya Modimo wa rona." Barategi, mo bofelong, le rona kajeno a re itumeleng, re tsholetse mantswe a rona, re duduetse mmogo, gonne MORENA o re golotse rona batho ba gagwe, gonne Morena o senotse pholoso ya gagwe mo matlhong a merafe yotlhe.

A Modimo Rraetsho yo o mo legodimong o re thuse rona rotlhe gore re nne bakuedi ba ba kuelang dikgang tse di monate tseo, re nne ba ba itsiseng kagiso mo merafeng yotlhe gore botlhe le mo dikhutlong tsa mafatshe otlhe ba utlwe ka ga pholoso, ba gogelwe mo go ene yo e leng Mogolodi wa merafe yotlhe, e bong Jesu Keresete Morepholosi, ene Morewa-Modimo yo re mo tsaletsweng go nna motho ruri, yo o kileng a swa, a ba a tsoga ka ntlha ya rona. Amen.

**9. Thapelo:** Morena Modimo Rara wa rona yo o mo legodimong, re a leboga, ka o re bonye mo botshwarong jwa go tshwarwa ke Satane, wa re romela Mogolodi wa nnete, e bong Morwao Jesu Keresete gore a re golole mo maleong, le mo losong, le mo thateng ya ga Satane, gore re busediwe mo go wena. Morena Jesu Keresete, re a leboga, ka o sa ntse wa tla mo go rona le kajeno ka Lefoko la gago, le ka disakaramente tse di boitshepo tsa gago, o sa ntse wa re itshwarela maleo a rona. Morena, o re fe Mowa o o Boitshepo wa gago gore pholoso eo e o e re baakanyeditseng re e fetisetse le mo go ba bangwe ba ba sa ntseng ba ntse mo lefifing gore merafe yotlhe mo dikhutlong tsa mafatshe otlhe e utlwe ka ga gago, e bile diwe mo tshabologong, le mo kolobetsong, le mo boitshwarelong jwa dibe mo leineng la gago. Amen.

Thapelo ya Morena: Rara wa rona yo o mo legodimong ...

10. Sefela sa 47 - 45/47

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali, ka ngwaga wa 1995; ya rongwa le ka 2002, le ka 2007.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.